

SLUŽBENI LIST

REPUBLIKE BOSNE I HERCEGOVINE



СЛУЖБЕНИ ЛИСТ

РЕПУБЛИКЕ БОСНЕ И ХЕРЦЕГОВИНЕ

Godina II - Broj 9

Četvrtak, 29. april/travanj 1993.
SARAJEVO

Za svaki broj posebno se
utvrđuje cijena
Žiro-račun 10100-603-1396

221

Na osnovu Amandmana LI tačka 5. stav 3. na Ustav Republike Bosne i Hercegovine; Predsjedništvo Republike Bosne i Hercegovine, na prijedlog Vlade Republike Bosne i Hercegovine, donosi

UREDBU SA ZAKONSKOM SNAGOM O POVEĆANJU NOVČANIH KAZNI I DRUGIH NOVČANIH IZNOSA

Član 1.

Povećavaju se 50 puta novčane kazne i drugi novčani iznosi propisani u:

1. Krivičnom zakonu Socijalističke Federativne Republike Jugoslavije, koji je kao republički zakon preuzet Uredbom sa zakonskom snagom o preuzimanju Krivičnog zakona Socijalističke Federativne Republike Jugoslavije ("Službeni list RBiH", br. 2/92, 10/92 i 16/92);

2. Zakonu o krivičnom postupku, koji je preuzet kao republički zakon Uredbom sa zakonskom snagom o preuzimanju Zakona o krivičnom postupku ("Službeni list RBiH", br. 2/92, 9/92 i 16/92);

3. a) Zakonu o privrednim prestupima, koji je preuzet kao republički zakon Uredbom sa zakonskom snagom o preuzimanju i primjenjivanju saveznih zakona koji se u Bosni i Hercegovini primjenjuju kao republički zakoni ("Službeni list RBiH", br. 2/92 i 16/92), i

b) drugim zakonima i drugim propisima u kojima su predviđeni privredni prestupi;

4. a) Zakonu o prekršajima ("Službeni list SRBiH", br. 19/86, 42/87, 33/89, 2/90 i 22/91 i "Službeni list RBiH", broj 16/92), i

b) drugim zakonima i drugim propisima u kojima su predviđeni prekršaji;

5. a) Zakonu o parničnom postupku, koji je preuzet kao republički zakon Uredbom sa zakonskom snagom o preuzimanju Zakona o parničnom postupku ("Službeni list RBiH", br. 2/92 i 16/92);

b) Uredbi sa zakonskom snagom o primjenjivanju Zakona o parničnom postupku, koji je preuzet kao republički zakon, za vrijeme neposredne ratne opasnosti ili za vrijeme ratnog stanja ("Službeni list RBiH", broj 6/92);

6. Zakonu o izvršnom postupku, koji je preuzet kao republički zakon Uredbom sa zakonskom snagom o preuzimanju i primjenjivanju saveznih zakona koji se u Bosni i Hercegovini

primjenjuju kao republički zakoni ("Službeni list RBiH", br. 2/92 i 16/92), i

7. Zakonu o opštem upravnom postupku, koji je preuzet kao republički zakon Uredbom sa zakonskom snagom o preuzimanju Zakona o opštem upravnom postupku u Republici Bosni i Hercegovini ("Službeni list RBiH", br. 2/92 i 16/92).

Povećavaju se 100 puta novčani iznosi sadržani u opisu krivičnih djela propisanih u:

1. Krivičnom zakonu Socijalističke Federativne Republike Jugoslavije iz tačke 1. stav 1. ovog člana;

2. Krivičnom zakonu Republike Bosne i Hercegovine ("Službeni list SRBiH", br. 19/77, 32/84, 19/86, 40/87, 41/87, 33/89, 2/90 i 24/91 i "Službeni list RBiH", broj 16/92);

3. Uredbi sa zakonskom snagom o primjeni Krivičnog zakona Republike Bosne i Hercegovine i Krivičnog zakona Socijalističke Federativne Republike Jugoslavije, koji je preuzet kao republički zakon, za vrijeme neposredne ratne opasnosti ili za vrijeme ratnog stanja ("Službeni list RBiH", br. 6/92, 11/92 i 21/92), i

4. drugim zakonima u kojima su propisana krivična djela.

Član 2.

U primjeni zakona i drugih propisa iz člana 1. stav 1. tač. 3. i 4. podtačke b. ove uredbe koji nisu usklađeni sa Uredbom sa zakonskom snagom o izmjenama Zakona o privrednim prestupima, koji je preuzet kao republički zakon ("Službeni list RBiH", broj 16/92), odnosno Uredbom sa zakonskom snagom o izmjenama i dopunama Zakona o prekršajima ("Službeni list RBiH", broj 16/92) novčane kazne i drugi novčani iznosi u tim propisima prethodno se povećavaju 20 puta, a nakon toga povećavaju se u skladu sa članom 1. stav 1. ove uredbe.

Član 3.

Uračunavanje pritvora i drugih lišenja slobode u vezi sa krivičnim djelom u novčanu kaznu po pravosnažno donesenim presudama do dana stupanja na snagu ove uredbe vršiće se po propisima koji su važili u vrijeme donošenja presude.

Član 4.

Ako je optužni predlog u postupku za privredne presteupe podnesen prije stupanja na snagu ove uredbe, dalji postupak provešće se prema pravilima postupka za privredne presteupe koja su važila do dana stupanja na snagu ove uredbe.

Ako Vrhovni sud Bosne i Hercegovine poslije stupanja na snagu ove uredbe ukinе odluku višeg suda i predmet vrati na ponovno suđenje, dalji postupak će se provesti po ovoj uredbi.

Član 5:

U postupku po zahtjevu za sudsku zaštitu podnesenom do dana stupanja na snagu ove uredbe primjenjivaće se pravila prekršajnog postupka koja su važila do dana stupanja na snagu ove uredbe.

Rješenje o prekršaju koje je postalo pravosnažno prije stupanja na snagu ove uredbe izvršiće se prema pravilima prekršajnog postupka koja su važila do dana stupanja na snagu ove uredbe.

Član 6.

Ako je prije stupanja na snagu ove uredbe donesena prvostepena presuda ili rješenje kojim je parnični postupak pred prvostepenim sudom okončan, dalji postupak provešće se prema pravilima parničnog postupka koja su važila do dana stupanja na snagu ove uredbe.

Ako po stupanju na snagu ove uredbe bude ukinuta prvostepena odluka iz stava 1. ovog člana, dalji postupak provešće se po ovoj uredbi.

O reviziji izjavljenoj protiv pravosnažne odluke drugostepenog suda u postupku koji je pokrenut prije stupanja na snagu ove uredbe rješavaće se prema pravilima parničnog postupka koja su važila do dana stupanja na snagu ove uredbe.

Član 7.

Ova uredba stupa na snagu danom objavljivanja u "Službenom listu RBiH".

PR broj 1452/93
23. aprila 1993. godine
Sarajevo

Predsjednik
Predsjedništva RBiH,
Alija Izetbegović, s. r.

222

Na osnovu člana 7. stav 2. Uredbe sa zakonskom snagom o napuštenim stanovima ("Službeni list RBiH", br. 6/92, 8/92 i 16/92), a u vezi sa članom 45. stav 2. Zakona o Vladi Republike Bosne i Hercegovine ("Službeni list SRBiH", broj 33/90 i "Službeni list RBiH", br. 4/92, 19/92 i 23/92), Vlada Republike Bosne i Hercegovine, na prijedlog Ministarstva prostornog uređenja, građevinarstva i zaštite okoline, donosi

ODLUKU

O IZMJENAMA I DOPUNAMA KRITERIJA ZA
DODJELU NAPUŠTENIH STANOVA NA
PRIVREMENO KORIŠĆENJE

I

U Kriterijima za dodjelu napuštenih stanova na privremeno korišćenje ("Službeni list RBiH", broj 9/92), u članu 2. stav 1. mijenja se i glasi:

"Pod uslovima propisanim Uredbom sa zakonskom snagom o napuštenim stanovima (u daljem tekstu: Uredba sa zakonskom snagom) i ovim kriterijima, opštinski organ uprave nadležan za stambene poslove, odnosno za udružene opštine u Gradu Sarajevu organ uprave za stambene poslove Grada (u daljem tekstu: nadležni organ), odnosno Ministarstvo prostornog uređenja, građevinarstva i zaštite okoline (u daljem tekstu: Ministarstvo prostornog uređenja), i načelnik Štaba Vrhovne komande oružanih snaga Republike Bosne i Hercegovine (u daljem tekstu: načelnik Štaba Vrhovne komande) dodjeljuju na privremeno korišćenje napuštene stanove iz čl. 5. i 7. Uredbe sa zakonskom snagom".

II

U članu 3. u stavu 1. riječi: "Opštinski organ uprave odnosno organ uprave Grada Sarajeva nadležan za stambene poslove" zamjenjuju se riječima: "Nadležni organ".

U stavu 2. riječi: "građevinarstva i zaštite okoline" brišu se, a riječi: "opštinski organ uprave odnosno organ uprave Grada Sarajeva nadležan za stambene poslove" zamjenjuju se riječima: "nadležni organ".

III

U članu 4. riječi: "Ministarstvo odbrane" zamjenjuju se riječima: "Načelnik Štaba Vrhovne komande".

IV

U članu 7. u stavu 2. broj "11" zamjenjuje se brojem "12".

V

U članu 9. riječi: "ministar odbrane" zamjenjuju se riječima: "načelnik Štaba Vrhovne komande".

VI

Član 12. mijenja se i glasi:

"Napušteni stan drugih saveznih organa i saveznih organizacija bivše SFRJ, koji se nalazi na teritoriji Republike, napušteni stan nosioca stansarskog prava na osnovu odredbi Zakona o stambenim odnosima i napušteni stan u svojini građana (u daljem tekstu: napušteni stan), dodjeljuje se na osnovu slijedećih prioriteta:

1. član uže porodice poginulog borca pružanih snaga Republike u borbi protiv agresora na Republiku;
2. pripadnik oružanih snaga Republike koji je teško povrijeđen u borbi protiv agresora na Republiku;
3. građani sa užom porodicom koji su u ostvarivanju agresorskih ciljeva na Republiku morali napustiti stan u kojem su stanovali, a traže dodjelu stana na području iste opštine odnosno Grada Sarajeva;
4. građanin kojem je srušena ili spaljena vlastita kuća ili stan ili stan na kojem je imao stansarsko pravo;
5. građani sa užom porodicom koji su pod prisilom agresora na Republiku napustili stalno mjesto stanovanja u cilju etničkog iseljenja stanovništva sa određenog područja;
6. ostala lica i izbjeglice sa ratom zahvaćenih područja;
7. pripadnik Armije RBiH".

VII

Član 14. mijenja se i glasi:

"Licima iz člana 12. tač. 1, 2. i 7. ovih kriterija nadležni organ može rješenjem dodijeliti na korišćenje napušteni stan, samo pod uslovom da se na području opštine odnosno Grada Sarajeva, na kojem traže dodjelu napuštenog stana, ne mogu zadovoljiti njihove stambene potrebe iz preuzetog stambenog fonda bivše JNA i da je za tu dodjelu stana načelnik Štaba Vrhovne komande, podnio pismeni prijedlog sa potrebnim dokazima i obrazloženjem".

VIII

Ova odluka stupa na snagu danom objavljivanja u "Službenom listu RBiH".

Broj 102/93
22. aprila 1993. godine
Sarajevo

Potpredsjednik
Vlade RBiH,
mr Hadžo Efendić, s. r.

223

Na osnovu člana 16. tačka 19. Uredbe sa zakonskom snagom o odbrani ("Službeni list RBiH", br. 4/92, 9/92, 19/92 i 23/93), Vlada Republike Bosne i Hercegovine, na prijedlog ministra odbrane, donosi

UPUTSTVO

O USLOVIMA I POSTUPKU IZDAVANJA
ODOBRENJA DRŽAVLJANIMA REPUBLIKE BOSNE
I HERCEGOVINE ZA PUTOVANJE U
INOSTRANSTVO NA PRIVREMENI BORAVAK ZA
VRIJEME RATNOG STANJA

1. Ovim uputstvom utvrđuju se uslovi i postupak izdavanja odobrenja državljanima Republike Bosne i Hercegovine (u daljem tekstu: Republika) za putovanje u inostranstvo na privremeni boravak, za vrijeme ratnog stanja.

Odobrenje za putovanje u inostranstvo, u skladu sa ovim uputstvom, izdaje se i licima - državljanima bivše SFRJ koja nemaju državljanstvo RBiH, a imaju prebivalište ili boravište na teritoriji RBiH.

2. Državljanin Republike, odnosno lice iz stava 2. tačka 1. ovog uputstva (u daljem tekstu: lica) koji namjerava da putuje u inostranstvo na privremeni boravak dužan je pribaviti odobrenje državnog organa određenog ovim uputstvom.

3. Odobrenje za putovanje u inostranstvo može se izdati radi službenog ili privatnog putovanja.

4. Službeno putovanje obuhvata putovanje u cilju izvršenja određenih poslova za potrebe oružanih snaga, državnih organa, preduzeća i drugih pravnih lica, odnosno samostalnih privrednika, i to radi:

- odlaska na rad u diplomatsko-konzularno predstavništvo ili učešća u radu državnih delegacija Republike;
- poslova i zadataka od posebnog značaja za odbranu, oružane snage i bezbjednost zemlje;
- izvršenja neodložnih obaveza po međunarodnim ugovorima;
- neodložne nabavke sirovina ili repromaterijala za proizvodnju, odnosno vršenje usluga ili naplate potraživanja u inostranstvu;

- dopremanja humanitarne pomoći u Republiku;
- prevoza roba i drugih sredstava za potrebe oružanih snaga, državnih organa, preduzeća i drugih pravnih lica, humanitarnih organizacija i drugih subjekata;

- organizovanog upućivanja ranjenih i bolesnih pripadnika oružanih snaga, policije i drugih građana na liječenje u inostranstvo, i

- učešća na međunarodnim ili drugim sportskim takmičenjima, naučnim i kulturnim manifestacijama kojima se prezentira Republika ili specijalizacije i drugih vidova stručnog usavršavanja, odnosno informisanja, kao i vjerskih potreba.

5. Državni organi, preduzeća ili druga pravna lica, odnosno samostalni privrednici koji organizuju službena putovanja u inostranstvo, dužni su uz zahtjev za izdavanje odobrenja priložiti saglasnost koju izdaju sljedeći organi:

- za putovanja koja organizuju ministarstva i drugi republički organi odnosno druge republičke institucije - ministarstvo u čiji djelokrug spadaju poslovi iz tačke 4. ovog uputstva,
- za putovanja koja organizuju okružni, gradski i opštinski državni organi, preduzeća i druga pravna lica, odnosno samostalni privrednici sa područje okruga - izvršni odbor okruga odnosno republičko povjereništvo za okrug, ako izvršni odbor okruga nije obrazovan, na prijedlog okružnog sekretarijata odbrane.

Ministarstva kojima je podnešen zahtjev za davanje saglasnosti mogu dati saglasnost, odnosno okružni sekretarijat odbrane može predložiti izdavanje saglasnosti samo u onim slučajevima za koje ocijene da se radi o poslovima iz tačke 4. ovog uputstva i da obavljanje tih poslova ne trpi odlaganje zbog čega mogu nastupiti znatne materijalne i druge štete za državu.

Prijedlog za izdavanje saglasnosti mora biti obrazložen u skladu sa odredbom tačke 4. ovog uputstva.

Ako se zbog ratne situacije saglasnost ne može pribaviti od izvršnog odbora okruga, odnosno republičkog povjereništva za okrug na čijem području državni organ, preduzeće i drugo pravno lice, odnosno samostalni privrednik ima prebivalište, odnosno boravište, u tom slučaju saglasnost se može tražiti od susjednog najbližeg izvršnog odbora okruga do kojeg podnosi-lac zahtjeva može doći.

Saglasnost iz stava 1. ove tačke daje se na obrascu koji se nalazi u prilogu ovog uputstva i čini njegov sastavni dio.

6. Zahtjev za odobrenje službenog putovanja u inostranstvo iz razloga predviđenih u tački 4. ovog uputstva podnosi:

- za radnike na radu u državnim organima, odnosno drugim institucijama - funkcioner koji rukovodi državnim organom,

odnosno drugom institucijom, a za radnike Ministarstva unutrašnjih poslova - ministar unutrašnjih poslova ili lica koja on ovlasti,

- za radnike na radu u preduzeću i drugom pravnom licu, odnosno za radnike angažovane za potrebe rada tih preduzeća i drugih pravnih lica - direktor ili drugi nadležni organ u preduzeću i drugom pravnom licu,

- za samostalnog privrednika, odnosno za radnika na radu kod samostalnog privrednika - samostalni privrednik.

Zahtjev iz stava 1. ove tačke sadrži: podatke o radniku za kojeg se traži odobrenje za službeno putovanje, razloge putovanja, zemlja u koju se putuje i vrijeme povratka u zemlju. Zahtjev se podnosi na obrascu koji se nalazi u prilogu ovog uputstva i čini njegov sastavni dio. Uz zahtjev se prilaže saglasnost odgovarajućeg organa iz tačke 5. ovog uputstva.

7. Privatno putovanje u inostranstvo obuhvata putovanje lica radi rješavanja ličnih ili porodičnih potreba, kao što je zbrinjavanje i smještaj djece, starih ili iznemoglih ili bolesnih članova porodice ili liječenje u inostranstvu ili sahrane ili dopreme posmrtnih ostataka članova porodice iz inostranstva, kao i posjećivanje bolesnih članova, odnosno članova porodice koji se duže nalaze u inostranstvu.

8. Odobrenje za privatno putovanje u inostranstvo iz razloga predviđenih u tački 7. ovog uputstva, može se izdati sljedećim licima: koja su od strane nadležne vojno-ljekarske komisije oglašeni nesposobnim za vojnu službu ili privremeno nesposobni za vojnu službu - dok privremena nesposobnost traje; koja su od nadležne ljekarske komisije ocijenjeni nesposobnim, odnosno privremeno nesposobnim za učešće u civilnoj zaštiti, odnosno za izvršavanje radne obaveze; maloljetnicima; koja nadležna zdravstvena ustanova upućuje na liječenje u inostranstvo i pratiocu tog lica, ako je određen od strane zdravstvene ustanove, odnosno vojno-ljekarske komisije; majkama sa maloljetnom djecom, odnosno drugim licima koja su po zakonu dužna da se neposredno brinu o maloljetnoj djeci (otac, ako majka djeteta nije živa, usvojilac, lice kod kojeg se dijete nalazi na organizovanom porodičnom smještaju, staratelj djeteta ako majka, odnosno roditelji djeteta nisu u životu ili su dijete napustili ili su spriječeni da se brinu o djetetu); trudnicama, ili majkama koje žele da posjete djecu; koja žele da posjete bolesne članove porodice, odnosno koji duže borave u inostranstvu; izbjeglicama; stranim državljanima i koja su navršila 60 godina (muškarci), odnosno 55 godina (žene) života; kao i licima za koja se organizuje povezivanje najbližih članova porodice sa zatvorenici puštenim iz agresorskih logora i zatvora, a nalaze se u inostranstvu, uz saglasnost Direkcije Republike za raseljena lica i izbjeglice.

Ako se vrši organizovano izmještanje djece do 18 godina života u inostranstvo, potrebno je priložiti saglasnost Direkcije Republike za raseljena lica i izbjeglice.

9. Odobrenje za privatno putovanje u inostranstvo iz razloga predviđenih u tački 7. ovog uputstva može se izdati i sljedećim licima:

- pripadniku oružanih snaga - uz saglasnost nadležnog stariješine jedinice ranga komandanta brigade ili višem, ustanove, komande ili štaba oružanih snaga u kojoj se nalazi na službi,
- pripadniku opštinskog štaba civilne zaštite i jedinice i povjereniku civilne zaštite u mjesnoj zajednici - uz saglasnost komandanta opštinskog štaba civilne zaštite, a za pripadnike okružnog, odnosno Republičkog štaba civilne zaštite uz saglasnost komandanta tih štabova,

- radniku državnog organa ili druge institucije - uz saglasnost funkcionera koji rukovodi državnim organom, odnosno drugom institucijom, a za radnike Ministarstva unutrašnjih poslova - ministar unutrašnjih poslova ili lica koja on ovlasti,

- radniku u preduzeću i drugom pravnom licu - uz saglasnost direktora, odnosno drugog nadležnog organa u preduzeću i drugom pravnom licu, i

- pripadniku službe osmatranja i obavješćavanja i kriptozastite - uz saglasnost funkcionera koji rukovodi organom uprave za odbranu u kojem se to lice nalazi u radnom odnosu, odnosno u kome je angažovan po osnovu ratnog rasporeda.

10. Odobrenje za privatno putovanje u inostranstvo može se izdati na pismeni zahtjev, koji sadrži: lične podatke, razloge putovanja, zemlja u koju se putuje i vrijeme povratka u zemlju. Uz zahtjev se prilažu odgovarajući dokazi iz tač. 8. i 9. ovog uputstva. Zahtjev se podnosi na obrascu koji se nalazi u prilogu ovog uputstva i čini njegov sastavni dio.

11. Odobrenje za službeno, odnosno privatno putovanje u inostranstvo izdaju, i to:

- za službena putovanja koja organizuju organi iz tačke 5. stav 1. alineja 1. ovog uputstva - Ministarstvo odbrane;

- za službena putovanja koja organizuje Ministarstvo unutrašnjih poslova - Ministarstvo unutrašnjih poslova,

- za službena putovanja koja organizuju organi, preduzeća ili druga pravna lica iz tačke 5. stav 1. alineja 2. ovog uputstva, kao i za privatna putovanja lica za koja se organizuje povezivanje najbližih članova porodice sa zatvorenicima puštenim iz agresorskih logora i zatvora koji su u inostranstvu - okružni sekretarijat odbrane, i

- za privatna putovanja lica iz tač. 8. i 9. ovog uputstva - opštinski sekretarijat za narodnu odbranu.

Odobrenje iz stava 1. ove tačke izdaje se u formi rješenja, prema obrascu koji se nalazi u prilogu ovog uputstva i čini njegov sastavni dio.

12. Odobrenje za službeno putovanje u inostranstvo i za privatno putovanje lica iz tačke 9. ovog uputstva, kao i lica za koje se organizuje povezivanje najbližih članova porodice sa zatvorenicima puštenim iz agresorskih logora i zatvora, može se izdati na vrijeme do tri mjeseca, a za privatno putovanje lica iz tačke 8. ovog uputstva, do godinu dana, o čemu odlučuju organi iz tačke 11. ovog uputstva.

Izuzetno od odredbe stava 1. ove tačke, odobrenje za službeno putovanje lica koja se upućuju na rad u inostranstvo izdaje se na vrijeme do godinu dana, o čemu odlučuju organi iz tačke 11. ovog uputstva.

13. Organi iz tačke 11. ovog uputstva odbiće zahtjev za izdavanje odobrenja za službeno ili privatno putovanje u inostranstvo, ako je protiv lica za koje se traži odobrenje pokrenut krivični postupak za krivično djelo za koje se gonjenje preduzima po službenoj dužnosti.

Podatke iz stava 1. ove tačke pribavljaju organi iz tačke 11. ovog uputstva po službenoj dužnosti, a izuzetno, te podatke može pribaviti i podnosilac zahtjeva.

14. Kontrolu odlaska građana u inostranstvo iz privatnih ili službenih razloga, po odobrenju izdatom u skladu sa ovim uputstvom vrše ovlašteni radnici Ministarstva unutrašnjih poslova.

15. Pod pojmom radnik u smislu ovog uputstva smatraju se radnici koji se nalaze u radnom odnosu u državnom organu, preduzeću i drugom pravnom licu ili kod samostalnog privrednika, pripadnici policije, kao i lica koja su po osnovu radne obaveze, vojne obaveze ili obaveze učesća u civilnoj zaštiti angažovana na rad u državnom organu, preduzeću i drugom pravnom licu po osnovu ratnog rasporeda.

16. Odobrenja za službena ili privatna putovanja u inostranstvo koja su izdata do dana stupanja na snagu ovog uputstva ostaju na snazi.

17. U odnosu na rokove rješavanja zahtjeva, žalbu, dostavljanje pismena i druga pitanja vezana za upravno rješavanje primjenjuje se Zakon o opštem upravnom postupku koji je preuzet kao republički zakon Uredbom sa zakonskom snagom o preuzimanju zakona o opštem upravnom postupku u Republici Bosni i Hercegovini ("Službeni list RBiH", br. 2/92 i 6/92).

18. Opšta akta koja su do dana stupanja na snagu ovog uputstva donijeli organi uprave ili vojni organi, a odnose se na pitanja regulisana ovim uputstvom, uskladiće se sa odredbama ovog uputstva u roku 15 dana od dana stupanja na snagu ovog uputstva.

19. Ovo uputstvo stupa na snagu danom objavljivanja u "Službenom listu RBiH".

V broj 108/93
29. april 1993. godine
Sarajevo

Potpredsjednik
Vlade RBiH,
mr Hadžo Efendić, s.r.

Republika Bosna i Hercegovina

Obrazac broj 1.

Ministarstvo odbrane - Ministarstvo obrane

Sarajevo

Rješenje koje donosi

Broj:

Ministarstvo odbrane

Sarajevo,

za službeno putovanje

Na osnovu tačke 11 Uputstva o uslovima i postupku izdavanja odobrenja državljanima Republike Bosne i Hercegovine za putovanje u inostranstvo na privremeni boravak za vrijeme ratnog stanja ("Službeni list RBiH", broj 9/93), rješavajući po zahtjevu

(naziv podnosioca zahtjeva)

(sjedište)

za izdavanje odobrenja za službeno putovanje u inostranstvo, donosim

RJEŠENJE

1. ODOBRAVA SE službeno putovanje u inostranstvo

..... iz

(prezime, ime i godina rođenja)

(mjesto prebivališta - boravišta)

za odlazak u

(zemlja u koju se putuje)

2. Odobrenje se izdaje na vrijeme od do

3. Nalaže se državnim i drugim organima RBiH da imenovanim - oj omogućie nesmetan odlazak u inostranstvo.

Obrazloženje

Podnosilac zahtjeva u zahtjevu je naveo da je odobrenje za službeno putovanje u inostranstvo potrebno radi

Uz zahtjev je priložen akt

(naziv organa)

broj od kojim je data saglasnost za to putovanje.

Pošto je zahtjev opravdan, dokumentovan i pravno osnovan, odlučeno je kao u izreci ovog rješenja.

Ovo rješenje je konačno u upravnom postupku.

DOSTAVLJENO:

- podnosiocu zahtjeva - 2 primjerka,

- Opštinskom sekretarijatu

odbrane

- u spis

- a/a

Potpis ovlaštenog lica

M.P.

Republika Bosna i Hercegovina

Obrazac broj 2.

Okrug

Okružni sekretarijat odbrane

.....

(sjedište)

Broj:

.....

(mjesto i datum)

Rješenje koje donosi
okružni sekretarijat
odbrane za službeno
putovanje

Na osnovu tačke 11. Uputstva o uslovima i postupku izdavanja odobrenja državljanima Republike Bosne i Hercegovine za putovanje u inostranstvo na privremeni boravak za vrijeme ratnog stanja ("Službeni list RBiH", broj 9/93), rješavajući po zahtjevu za

(naziv podnosioca zahtjeva)

izdavanje odobrenja za službeno putovanje u inostranstvo, donosim

RJEŠENJE

1. ODOBRAVA SE službeno putovanje u inostranstvo iz
(prezime, ime i godina rođenja) (mjesto prebivališta - boravišta)
za odlazak u
(zemlja u koju se putuje)

2. Odobrenje se izdaje na vrijeme od do

3. Nalaže se državnim i drugim organima RBiH da imenovanom - oj omogućе nesmetan odlazak u inostranstvo.

Obrazloženje

Podnosilac zahtjeva u zahtjevu je naveo da je odobrenje za službeno putovanje u inostranstvo potrebno radi

Uz zahtjev je priložen akt

(naziv organa koji je izdao saglasnost)

broj od kojim je data saglasnost za to putovanje.

Pošto je zahtjev opravdan, dokumentovan i pravno osnovan, odlučeno je kao u izreci ovog rješenja.

Protiv ovog rješenja može se izjaviti žalba u roku od osam dana od dana prijema rješenja. Žalba se podnosi Ministarstvu odbrane a predaje okružnom sekretarijatu odbrane koji je donio ovo rješenje.

DOSTAVLJENO:

- podnosiocu zahtjeva
- Opštinskom sekretarijatu za narodnu odbranu
- u spis
- a/a

M.P.

Sekretar
Okružnog sekretarijata

(prezime i ime)

Republika Bosna i Hercegovina

Opština

Opštinski sekretarijat za

narodnu odbranu

Broj:

(mjesto i datum)

Obrazac broj 3.

Rješenje koje donosi
opštinski sekretarijat za
narodnu odbranu za
privatno putovanje

Na osnovu tačke 11. Uputstva o uslovima i postupku izdavanja odobrenja državljanima Republike Bosne i Hercegovine za putovanje u inostranstvo na privremeni boravak za vrijeme ratnog stanja ("Službeni list RBiH", broj 9/93), rješavajući po zahtjevu iz

(prezime i ime)

(mjesto prebivališta - boravišta)

za izdavanje odobrenja za privatno putovanje u inostranstvo, donosim

RJEŠENJE

1. ODOBRAVA SE privatno putovanje u inostranstvo iz
(prezime, ime i godina rođenja) (mjesto prebivališta - boravišta)
za odlazak u
(zemlja u koju se putuje)

2. Odobrenje se izdaje na vrijeme od do

3. Nalaže se državnim i drugim organima RBiH da imenovanom - oj omogućе nesmetan odlazak u inostranstvo.

Obrazloženje

Podnosilac zahtjeva traži da mu se izda odobrenje za privatno putovanje u inostranstvo radi

Uz zahtjev je priložio - la

(navesti odgovarajuće dokaze)

Pošto je zahtjev opravdan, dokumentovan i pravno osnovan, odlučeno je kao u izreci ovog rješenja.

Protiv ovog rješenja može se izjaviti žalba u roku od osam dana od dana prijema rješenja. Žalba se podnosi Okružnom sekretarijatu odbrane , predaje opštinskom sekretarijatu za narodnu odbranu koji je donio ovo rješenje.

DOSTAVLJENO:

- podnosiocu zahtjeva
- u spis
- a/a

M. P.

Sekretar
Opštinskog
sekretarijata

(prezime i ime)

Obrazac broj 4.

Zahtjev za izdavanje
odobrenja za službeno
putovanje u inostranstvo

(naziv i sjedište podnosioca zahtjeva)

(naziv organa kome se podnosi zahtjev)

ZAHTEJV

ZA IZDAVANJE ODOBRENJA ZA SLUŽBENO
PUTOVANJE U INOSTRANSTVO

Za potrebe obavljanja određenih poslova, tražimo da se našem radniku izda

(prezime i ime)

odobrenje za službeno putovanje u inostranstvo u

(zemlja u koju se putuje)

Putovanje je potrebno

(navesti razloge putovanja)

Putovanje bi trajalo od do

Uz zahtjev prilažemo saglasnost

(naziv organa koji je dao saglasnost)

M.P.

(mjesto i datum)

(potpis ovlaštenog lica podnosioca zahtjeva)

Obrazac broj 5.

Zahtjev za izdavanje
odobrenja za privatno
putovanje u inostranstvo

(prezime, ime i adresa podnosioca)

OPŠTINSKI SEKRETARIJAT
ZA NARODNU ODBRANU

ZAH T J E V ZA IZDAVANJE ODOBRENJA ZA PRIVATNO PUTOVANJE U INOSTRANSTVO

Tražim da se izda odobrenje za privatno putovanje u inostranstvo u

(navesti zemlju u koju se putuje)

Putovanje bi trajalo od do Putovanje u inostranstvo tražim radi

(navesti razloge putovanja)

Uz zahtjev prilažemo saglasnost

(naziv organa koji je dao saglasnost)

M.P.

(mjesto i datum)

(potpis podnosioca zahtjeva)

Obrazac broj 6.

Saglasnost za izdavanje
odobrenja za službeno
putovanje

(organ koji daje saglasnost)

Na osnovu tačke 5. stav 1. Uputstva o uslovima i postupku izdavanja odobrenja državljanima Republike Bosne i Hercegovine za putovanje u inostranstvo na privremeni boravak za vrijeme ratnog stanja ("Službeni list RBiH", broj 9/93), na prijedlog

(naziv organa koji predlaže)

izdaje se sljedeća

SAGLASNOST

Daje se saglasnost za izdavanje odobrenja za službeno putovanje u inostranstvo

(prezime i ime lica i naziv organa, preduzeća i drugog pravnog lica koje organizuje putovanje)

U (zemlja u koju se putuje)

Putovanje je potrebno iz razloga

M.P.

(potpis ovlaštenog lica,
organa koji daje saglasnost)

224

Na osnovu člana 2. stav 1. Uredbe o načinu formiranja cijena određenih proizvoda i usluga ("Službeni list SRBiH", br. 4/92, 5/92 i 7/92 i "Službeni list RBiH", broj 1/92), Vlada Republike Bosne i Hercegovine, donosi

RJEŠENJE

O DAVANJU SAGLASNOSTI NA CIJENE UGLJA ZA TERMoeLEKTRANE

1. Daje se saglasnost rudnicima uglja u Republici Bosni i Hercegovini, da cijene uglja za termoelektrane mogu povećati za 197%.

2. Cijene uglja za termoelektrane iz tačke 1. ovog rješenja primjenjivaće se od 1. maja 1993. godine.

3. Rudnici uglja dužni su da cjenovnike usaglašene sa ovim rješenjem dostave Ministarstvu robnog prometa, poduzetništva

i turizma u roku od tri dana od dana primjene cijena uglja za termoelektrane, utvrđene ovim rješenjem.

4. Ovo rješenje objaviti u "Službenom listu RBiH".

V broj 104/93

26. aprila 1993. godine

Sarajevo

Potpredsjednik

Vlade RBiH,

mr Hadžo Efendić, s. r.

225

Na osnovu člana 2. stav 1. Uredbe o načinu formiranja cijena određenih proizvoda i usluga ("Službeni list SRBiH", br. 4/92, 5/92 i 7/92 i "Službeni list RBiH", broj 1/92), Vlada Republike Bosne i Hercegovine, donosi

RJEŠENJE

O DAVANJU SAGLASNOSTI NA CIJENE ELEKTRIČNE ENERGIJE

1. Daje se saglasnost Javnom preduzeću "Elektroprivreda BiH" - Sarajevo da cijene električne energije poveća za 197%.

2. Cijene električne energije iz tačke 1. ovog rješenja primjenjivaće se od 1. maja 1993. godine.

3. Nalaže se Javnom preduzeću za proizvodnju, prenos i distribuciju električne energije "Elektroprivreda BiH" Sarajevo, da cjenovnik usaglašen sa ovim rješenjem dostavi Ministarstvu robnog prometa, poduzetništva i turizma, u roku od tri dana od početka primjene cijena električne energije utvrđenih ovim rješenjem.

4. Ovo rješenje objaviti u "Službenom listu RBiH".

V broj 105/93

26. aprila 1993. godine

Sarajevo

Potpredsjednik

Vlade RBiH,

mr Hadžo Efendić, s. r.

226

Na osnovu člana 2. stav 3. Uredbe sa zakonskom snagom o platama i drugim ličnim primanjima radnika za vrijeme ratnog stanja ili u slučaju neposredne ratne opasnosti ("Službeni list RBiH", broj 5/93), Vlada Republike Bosne i Hercegovine donosi

SAOPŠTENJE

O VISINI PLATA ZA APRIL/TRAVANJ 1993. GODINE

Najniža plata za april/travanj 1993. godine iznosi 48.000 BHD.

Broj 106/93

22. aprila 1993. godine

Sarajevo

Sekretar

Vlade RBiH,

Enes Gotovuša, s. r.

227

Na osnovu člana 14. stav 3. Uredbe sa zakonskim snagom o obrazovanju i radu okruga ("Službeni list RBiH", br. 12/92, 14/92, 18/92, 27/92 i 3/93), i tačke I, II i III Odluke o broju i načinu izbora odbornika iz Skupštine opština i Skupštine grada Sarajeva u Skupštinu Okruga ("Službeni list RBiH", broj 18/92), Predsjedništvo Skupštine grada Sarajeva na 94. sjednici održanoj 20. aprila 1993. godine donijelo je sljedeće:

RJEŠENJE

O IZBORU ODOBNIKA U SKUPŠTINU OKRUGA SARAJEVO

U Skupštinu Okruga Sarajevo biraju se:

1. Ante Zelić, odbornik Skupštine grada Sarajeva
2. Esad Afgan, odbornik Skupštine grada Sarajeva
3. Kemal Hujjić, odbornik Skupštine grada Sarajeva
4. Muhidin Zelić, odbornik Skupštine grada Sarajeva
5. Miodrag Janković, odbornik Skupštine grada Sarajeva
6. Tarik Kupusović, odbornik Skupštine grada Sarajeva
7. Tomislav Obrdaj, poslanik Skupštine RBiH
8. Luka Bjelica, odbornik Skupštine grada Sarajeva

9. Mehmed Drino, odbornik Skupštine grada Sarajeva
 10. Kasim Begić, poslanik Skupštine RBiH
 11. Avdija Hadrović, poslanik Skupštine RBiH
 12. Muhamed Saračević, poslanik Skupštine RBiH
 13. Mustafa Pamuk, poslanik Skupštine RBiH
- Ovo rješenje objaviće se u "Službenom listu RBiH".

Broj 01-012-70-94-1/93
20. aprila 1993. godine
Sarajevo

Predsjednik Predsjedništva
Skupštine grada Sarajeva
Muhamed Kreševljaković, s. r.

Ustavni sud Bosne i Hercegovine

Ustavni sud Bosne i Hercegovine, na osnovu člana 387. stav 1. tačka 3. i stav 3. Ustava Republike Bosne i Hercegovine i člana 72. tačka 3. Poslovnika Ustavnog suda Bosne i Hercegovine, na sjednici održanoj 11. 2. 1993. godine, donio je

ODLUKU

Utvrđuje se da su odredbe stava 2. Odluke broj 01-01-516/91 od 9. 7. 1991. godine i tačke I i III Odluke broj 01-01-616/91, od 1. 10. 1991. godine, Stomatološkog fakulteta u Sarajevu, u vrijeme važenja bile u suprotnosti sa zakonom.

Ova odluka objaviće se u "Službenom listu RBiH" i Stomatološkom fakultetu u Sarajevu, na način predviđen za objavljivanje opštih akata.

Obrazloženje

Prijedlogom Ministarstva za obrazovanje, nauku, kulturu i fizičku kulturu Sarajevo, od 29. 1. 1992. godine, pokrenut je postupak za ocjenjivanje zakonitosti stava 2. navedene odluke, kojim je utvrđeno da su svi studenti koji su ispunili uslov za upis u I godinu studija i nalaze se na rang listi od broja 1-150 dužni na ime materijalnih troškova praktičnog dijela nastave uplatiti iznos od 5.000 dinara, kao i iznos od 150 dinara za studentski standard i 100 dinara na ime osiguranja studenata i tački I i III Odluke, kojima je utvrđeno da su redovni studenti Stomatološkog fakulteta koji su ispunili uslov za upis naredne godine studija, kao i preclaznici sa stomatoloških fakulteta u SFRJ, koji ispunjavaju uslove za upis u narednu godinu studija, dužni Stomatološkom fakultetu na ime praktičnog dijela nastave, biblioteke i ostalih aktivnosti studenata, uplatiti iznos od 5.000 dinara.

Stavom 1. Odluke od 9. 7. 1991. godine, utvrđeno je da redovni studenti koji su ispunili uslov za upis u I godinu školske 1991/92. godine plaćaju troškove studija u iznosu od 20.000 dinara.

U toku postupka utvrđeno je da je Stomatološki fakultet u Sarajevu donio Odluku o plaćanju troškova studija za školsku 1992/93. godinu, broj 01-06-1219/92, od 3. 12. 1992. godine, tako da su Odluka od 9. 7. 1991. godine i Odluka od 1. 10. 1991. godine važile samo za školsku 1991/92. godinu.

Zakonom o univerzitetu ("Službeni list SRBiH", broj 39/90) propisano je da visokoškolska ustanova može obavezati redovne studente jugoslovenske državljanke da plaćaju troškove studija, u skladu sa kriterijima Republičkog javnog fonda za visoko obrazovanje (član 57.) i da Upravni odbor Republičkog javnog fonda utvrđuje, između ostalog, kriterije o uslovima, visini i načinu plaćanja troškova studija (član 96. stav 1. tačka 6.).

Kriterijima o uslovima, visini i načinu plaćanja troškova dodiplomskog studija za školsku 1991/92. godinu, koje je utvrdio Privremeni upravni odbor Republičkog javnog fonda za visoko obrazovanje, utvrđeno je da učešće u troškovima studija za redovne studente koji su položili kvalifikacioni ispit za upis u I godinu studija, a po broju osvojenih bodova ne ulaze u kvotu redovnih studenata koji ne plaćaju troškove studija, kao i za vanredne studente koji prvi put upisuju I, II, III, IV i V godinu studija na Stomatološkom fakultetu, iznosi 20.000 dina-

ra (tačka 1.) i da studenti koji nisu izvršili svoje materijalne obaveze ne mogu prisustvovati nastavi (predavanja, vježbe i drugi oblici nastavnog rada) i ne mogu pristupiti ispitima (tačka 7).

S obzirom na navedene zakonske odredbe visokoškolska ustanova može obavezati redovne studente da plaćaju troškove studija samo u skladu sa Kriterijima Republičkog javnog fonda. Kako su osporenim odlukama studenti Stomatološkog fakulteta obavezani da u školskoj 1991/92. godini plaćaju troškove studija u većem iznosu od iznosa utvrđenog u navedenim kriterijima, to su, po ocjeni Ustavnog suda, osporeni stav 2. Odluke od 9. 7. 1991. godine, i tačke I i III Odluke od 1. 10. 1991. godine, u vrijeme važenja bile u suprotnosti sa zakonom.

Broj U 18/92
11. februara 1993. godine
Sarajevo

Predsjednik
Ustavnog suda BiH,
prof. dr Ismet Dautbašić, s. r.

Ustavni sud Bosne i Hercegovine, na osnovu člana 387. stav 1. tačka 3. Ustava Republike Bosne i Hercegovine i člana 72. tačka 3. Poslovnika Ustavnog suda Bosne i Hercegovine, na sjednici održanoj 14. 1. 1993. godine, donio je

ODLUKU

Ukida se odredba člana 24. Odluke o doprinosu za zdravstvenu zaštitu, koju je donijela Samoupravna interesna zajednica zdravstvene zaštite Sarajevo ("Službeni list SRBiH", br. 42/87, 23/88, 28/88, 45/88, 26/89 i 45/89).

Ova odluka objaviće se u "Službenom listu RBiH".

Obrazloženje

Prijedlogom Saveza omladinskih i studentskih zadruga i servisa Bosne i Hercegovine, od 8. 2. 1991. godine, pokrenut je postupak za ocjenjivanje zakonitosti navedene odredbe Odluke, kojom je, između ostalog, utvrđeno da se na izvršene isplate daciima i studentima koji se nalaze na redovnom školovanju, a obavljaju rad u dačkim i studentskim uslužnim servisima i studentskim organizacijama, studentskim zadrugama, plaća doprinos na osnovicu koja čini neto iznos svih isplaćenih naknada za izvršeni rad. Predlagač je mišljenja da je osporena odredba u suprotnosti sa Zakonom o finansiranju zajedničkih potreba.

U odgovoru na navode prijedloga Samoupravna interesna zajednica zdravstvene zaštite Sarajevo ukazuje da osporena odredba ima osnov u članu 99. Zakona o zdravstvenoj zaštiti ("Službeni list SRBiH", br. 18/86, 17/89 i 38/90), kojim je određeno da se za lica koja nisu obuhvaćena članom 98. istog zakona, osnov za obračunavanje doprinosa utvrđuje u zajednici zdravstvene zaštite, zavisno od rizika zdravstvene zaštite.

Zakonom o finansiranju zajedničkih potreba ("Službeni list SRBiH", br. 40/79, 28/80 i 22/83), koji je bio na snazi u vrijeme donošenja Odluke, bilo je propisano da se doprinos iz ličnog dohotka radnika, ako zakonom nije drukčije određeno, ne plaća iz sredstava koje studenti i učenici na redovnom školovanju primaju za rad u studentskim i dačkim organizacijama i sredstava koja se primaju za povremeni rad članova omladinskih organizacija u omladinskim zadrugama i servisima do visine od 50% od prosječnog godišnjeg čistog ličnog dohotka po zaposlenom radniku ostvarenog u prethodnoj godini, kojeg utvrdi i saopšti Republički zavod za statistiku (član 26. tačka 8).

Navedeni zakon prestao je da važi stupanjem na snagu Zakona o finansiranju zajedničkih potreba ("Službeni list SRBiH", br. 1/88, 15/89, 26/89 i 22/90), kojim je propisano da se sredstva za zadovoljavanje zajedničkih potreba obezbjeđuju iz doprinosa iz ličnog dohotka radnika (član 12. tačka 2.). Osnovica doprinosa iz ličnog dohotka radnika je svaki pojedinačni iznos primljenog ličnog dohotka radnika (član 22. stav 1.). Ne smatraju se ličnim dohotkom naknade i druga primanja na koje se ne plaća porez iz ličnog dohotka radnika,

shodno odredbi člana 31. stav 1. Zakona o porezima građana (član 23.).

Zakonom o porezima građana ("Službeni list SRBiH", br. 39/84, 8/85, 45/86, 14/88, 20/90 i 8/91) propisano je da se porez iz ličnog dohotka ne plaća, između ostalog, po osnovu naknada učenicima i studentima za vrijeme praktičnog rada i rada u učeničkim, omladinskim i studentskim zadrugama i servisima, kao i naknada nezaposlenim licima za vrijeme rada u tim zadrugama i servisima (član 31. stav 1. tačka 5.).

Zakonom o omladinskim zadrugama ("Službeni list SRBiH", broj 20/88), koji je prestao da važi stupanjem na snagu Zakona o prestanku važenja Zakona o omladinskim zadrugama ("Službeni list SRBiH", broj 33/90), bilo je propisano da se na naknade isplaćene za rad članovima zadruge ne plaćaju porezi i doprinosi, osim doprinosa za zdravstvenu zaštitu, penzijsko i invalidsko osiguranje i da visinu doprinosa utvrđuju odnosne samoupravne interesne zajednice (članovi 29. i 32.).

Iz navedenog proizilazi da je Zakonom o finansiranju zajedničkih potreba, koji je bio na snazi u vrijeme donošenja Odluke, plaćanje doprinosa na sredstva primljena za rad u dačkim, omladinskim i studentskim zadrugama zavisilo od visine primljenih sredstava. Kako je osporena odredba obavezivala na plaćanje doprinosa bez obzira na visinu primljenih sredstava, to je već u vrijeme donošenja bila u suprotnosti sa zakonom.

Važeći Zakon o finansiranju zajedničkih potreba uopšte ne predviđa da se na naknade po osnovu rada u učeničkim, omladinskim i studentskim zadrugama plaća doprinos, pa je osporena odredba i sada u suprotnosti sa zakonom.

Osporena odredba ne može imati osnov u članu 99. Zakona o zdravstvenoj zaštiti ("Službeni list SRBiH", br. 18/86, 17/89 i 38/90), jer u odnosu na njega član 23. Zakona o finansiranju zajedničkih potreba ima karakter posebnog i kasnijeg propisa.

Obavezivanje na plaćanje doprinosa bilo je moguće samo u periodu važenja Zakona o omladinskim zadrugama. Pošto ovaj zakon više nije na snazi, a za obavezivanje na plaćanje spornog doprinosa nije bilo zakonskog osnova ni u vrijeme donošenja Odluke, Ustavni sud je osporenu odredbu ukinuo.

Broj U 14/91 Predsjednik
14. januara 1993. godine Ustavnog suda BiH,
Sarajevo prof. dr Ismet Dautbašić, s. r.

Ustavni sud Bosne i Hercegovine, na osnovu člana 387. stav 1. tačka 2. Ustava Republike Bosne i Hercegovine i člana 72. tačka 5. Poslovnika Ustavnog suda Bosne i Hercegovine, na sjednici održanoj 11. 2. 1993. godine, donio je

ODLUKU

Odbija se prijedlog Šumsko-privrednog preduzeća u društvenoj svojini "Gorica" Šipovo za ocjenjivanje zakonitosti Odluke o naknadi za vatrogastvo, broj 01/1-021-26/91, od 22. 3. 1991. godine, koju je donijela Skupština opštine Šipovo ("Službeni glasnik opštine Šipovo", broj 2/91).

Ova odluka objaviće se u "Službenom listu RBiH" i u "Službenom glasniku opštine Šipovo".

Obrazloženje

Prijedlogom Šumsko-privrednog preduzeća u društvenoj svojini "Gorica" Šipovo, od 10. 6. 1991. godine, pokrenut je postupak za ocjenjivanje zakonitosti navedene odluke, kojom je utvrđena obaveza plaćanja naknade za finansiranje rada Dobrovoljnog vatrogasnog društva Šipovo. Prema mišljenju predlažača osporena odluka je u nesaglasnosti sa zakonom zbog toga što je naknada utvrđena različito za "individualni" i "društveni" sektor.

Od Skupštine opštine Šipovo je zatražen odgovor na navode iz prijedloga, ali odgovor nije dostavljen.

Prema Zakonu o zaštiti od požara ("Službeni list SRBiH", br. 15/87, 33/88, 38/89 i 36/90), sredstva fonda za obezbjeđivanje materijalnih i drugih uslova za rad dobrovoljnog vatrogasnog društva ostvaruju se iz naknade koja se određuje prema katastarskom prihodu, odnosno prema hektaru obradive površine i površine obrasle šumom, a visinu naknade utvrđuje skupština opštine (član 74c. stav 2. i 3.).

S obzirom na navedene zakonske odredbe, skupština opštine je ovlaštena da utvrđuje naknadu za rad dobrovoljnog vatrogasnog društva. Ova naknada može se odrediti i prema katastarskom prihodu i prema površini šume, pa prema tome utvrđivanje naknade za šume u privatnom vlasništvu prema katastarskom prihodu, a za šume u društvenom vlasništvu, prema površini šume, po ocjeni Ustavnog suda, nije u nesaglasnosti sa Zakonom.

Broj U 106/91 Predsjednik
11. februara 1993. godine Ustavnog suda BiH,
Sarajevo prof. dr Ismet Dautbašić, s. r.

Ustavni sud Bosne i Hercegovine, na osnovu člana 387. stav 1. tačka 1. i člana 395. Ustava Republike Bosne i Hercegovine, na sjednici održanoj 23. 3. 1993. godine, donio je

ODLUKU

Utvrđuje se da odredba člana 21. stav 1. tačka 5. Zakona o advokaturi ("Službeni list SRBiH", br. 34/89 i 27/91) nije u saglasnosti sa Ustavom Republike Bosne i Hercegovine.

U smislu člana 395. Ustava Republike Bosne i Hercegovine, Odluka će se dostaviti Skupštini Republike Bosne i Hercegovine radi usklađivanja Zakona o advokaturi sa Ustavom.

Ova odluka objaviće se u "Službenom listu RBiH".

Obrazloženje

Ustavni sud Bosne i Hercegovine, rješenjem od 2. 4. 1992. godine, pokrenuo je postupak za ocjenjivanje ustavnosti odredbe člana 21. stav 1. tačka 5. Zakona o advokaturi, kojom je propisano da pravo na upis u imenik advokata ima lice koje je po svojim radnim i ljudskim kvalitetima dostojno vršenja advokatske djelatnosti.

Rješenje o pokretanju postupka dostavljeno je 21. 8. 1992. godine Skupštini Republike Bosne i Hercegovine i zatraženo da do 15. 9. 1992. godine dostavi odgovor na navode iz rješenja. Odgovor u ostavljenom roku nije dostavljen.

Prema Ustavu Republike Bosne i Hercegovine, Republika preko republičkih organa, u okviru svojih prava i dužnosti utvrđenih Ustavom, uređuje advokaturu i druge, vidove pravne pomoći (član 304. stav 1. tačka 20.). Ustavom je zajamčeno pravo na rad (član 166. stav 1.). Članom 167. stav 1, 2. i 3. Ustava propisano je da se zajamčuje sloboda rada, da svako slobodno bira svoje zanimanje i zaposlenje i da su svakom građaninu pod jednakim uslovima dostupni svako radno mjesto i funkcija u društvu.

Navedenim ustavnim odredbama dato je pravo i obaveza Republici da uredi advokaturu, a to znači da u cjelosti reguliše sve odnose i pitanja kojima će se obezbijediti ostvarivanje funkcija advokature kao samostalne društvene službe. U tom smislu je i ustavna obaveza zakonodavca da propiše uslove za vršenje advokatske djelatnosti odnosno uslova za upis u imenik advokata.

Osporenim odredbom propisan je kao jedan od uslova za upis u imenik advokata "radni i ljudski kvaliteti", ali pri tome nije određen sadržaj tog uslova niti postoje kriterijumi na osnovu kojih se može odrediti i dokazati ispunjavanje tako utvrđenog uslova. Ovakvim određivanjem prepušta se nadležnom organu da po vlastitom nahodjenju utvrđuje sadržaj i domet ovog uslova, što može dovesti do proizvoljnosti, subjektivizma i nejednake primjene, čime se dovodi u pitanje ustavni princip pravne jednakosti građana.

Zbog toga je Ustavni sud ocijenio da su propisivanjem navedenog uslova povrijedene odredbe člana 166. stav 1. i člana 167. stav 1, 2. i 3. Ustava Republike Bosne i Hercegovine, pa je odlučeno kao u dispozitivu.

U 130/91

Predsjednik

23. marta 1993. godine

Ustavnog suda BiH,

Sarajevo

prof. dr Ismet Dautbašić, s. r.

Ustavni sud Bosne i Hercegovine, na osnovu člana 387. stav 1. tačka 3. Ustava Republike Bosne i Hercegovine i člana 72. tačka 4. Poslovnika Ustavnog suda Bosne i Hercegovine, na sjednici održanoj 14. 1. 1993. godine, donio je

ODLUKU

Utvrđuje se da je odredba člana 41. tačka 10. Pravilnika o rješavanju stambenih potreba radnika Društvenog preduzeća za trgovinski promet na veliko i malo "Progres" Lukavac, od 15. 6. 1990. godine, u vrijeme važenja bila u suprotnosti sa zakonom.

Ova odluka objaviće se u "Službenom listu RBiH" i u Dioničarskom društvu u mješovitoj svojini za trgovinski promet na veliko i malo "Progres" Lukavac, na način predviđen za objavljivanje opštih akata.

Obrazloženje

Rješenjem Ustavnog suda Bosne i Hercegovine, od 14. 11. 1991. godine, pokrenut je postupak za ocjenjivanje zakonitosti navedene odredbe Pravilnika, kojom je utvrđeno da radnik može učestvovati ličnim sredstvima u kupovini stana u cilju sticanja susvojine na stanu, koje iznosi najmanje 10% od vrijednosti stana za koji je podnio zahtjev i da po tom osnovu ostvaruje određen broj bodova.

U toku postupka kod Ustavnog suda navedeno društveno preduzeće postalo je Dioničarsko društvo. Statutom Društva, od 2. 12. 1991. godine, utvrđeno je da pravilnike i odluke kao opšte akte donosi Upravni odbor Društva (član 115. stav 1.). Upravni odbor Društva, odlukom broj 32/92 od 11. 2. 1992. godine, utvrdio je da je osporeni Pravilnik prestao da važi 11. 2. 1992. godine.

Zakonom o susvojini na stanu ("Službeni list SRBiH", br. 26/89 i 27/91) propisano je: da susvojinu na stanu mogu steći fizička lica ako je to, u skladu sa zakonom, predviđeno opštim aktom društvenog pravnog lica koje na stanu u društvenoj svojini ima pravo raspolaganja i da o sticanju susvojine na stanu odlučuje organ određen opštim aktom društvenog pravnog lica (član 2. stav 1. i 2.); da se susvojina na stanu može steći ako vrijednost suvlasničkog dijela stana iznosi najmanje 1/10 vrijednosti stana, s tim što vrijednost suvlasničkog dijela stana prilikom svakog daljeg otkupa ne može biti manja od 1/20 vrijednosti stana (član 3. stav 1.); da se susvojina na stanu može steći: 1. zajedničkim ulaganjem ličnih sredstava fizičkih lica (u daljem tekstu: lično učešće) i sredstava kojim za rješavanje stambenih potreba raspolaze društvena pravna lica u cilju izgradnje ili kupovine stana; 2. kupovinom suvlasničkog dijela stana u društvenoj svojini; 3. prenošenjem prava svojine na porodičnoj stambenoj zgradi, odnosno stanu kao posebnom dijelu zgrade na društveno-pravno lice u zamjenu za veći, odnosno komforniji stan kojim raspolaze društveno-pravno lice; 4. ulaganjem ličnih sredstava radi poboljšanja uslova stanovanja u stanu kojim raspolaze društveno-pravno lice; 5. u drugim slučajevima predviđenim zakonom (član 4.); da se u slučaju sticanja susvojine na stanu zajedničkim ulaganjem ličnih i društvenih sredstava, mogu u okviru programa stambene izgradnje koristiti samo ona društvena sredstva koja se za ovu namjenu posebno izdvoje iz ukupnih sredstava za stambenu izgradnju (član 8.) i da se ponuda za zaključivanje ugovora za sticanje susvojine na stanu na način iz prethodnog člana podnosi organu iz člana 2. stav 2. ovog Zakona i sadrži podatke o

strukturi i veličini stana na kome želi da stekne susvojinu, stambenim prilikama i o broju članova svog porodičnog domaćinstva i visini ličnog učešća (član 9.).

S obzirom na navedene zakonske odredbe opštim aktom društvenog pravnog lica utvrđuju se oblici sticanja susvojine, posebna sredstva koja se izdvajaju za te namjene i organ koji odlučuje o sticanju susvojine.

Kako osporavanom odredbom, a ni drugim odredbama Pravilnika, nisu bili utvrđeni oblici sticanja susvojine, posebna sredstva i organ koji o tome odlučuje, to je ova odredba u vrijeme važenja bila u suprotnosti sa zakonom.

Broj U 75/91

Predsjednik

14. januara 1993. godine

Ustavnog suda BiH,

Sarajevo

prof. dr Ismet Dautbašić, s. r.

Ustavni sud Bosne i Hercegovine, na osnovu člana 387. stav 1. tačka 3. Ustava Republike Bosne i Hercegovine i člana 72. tačka 3. Poslovnika Ustavnog suda Bosne i Hercegovine, na sjednici održanoj 23. 3. 1993. godine, donio je

ODLUKU

Ukidaju se odredbe člana 6. stav 1. tačka 4, člana 44. stav 1. tačka 1. i članova 46, 47, 48. i 49. Pravilnika o stambenim odnosima Društvenog preduzeća za grafičke usluge "Štamparija" Gračanica, od 9. 10. 1990. godine.

Ova odluka objaviće se u "Službenom listu RBiH" i Društvenom preduzeću za grafičke usluge "Štamparija" Gračanica, na način predviđen za objavljivanje opštih akata.

Obrazloženje

Rješenjem Ustavnog suda Bosne i Hercegovine, od 5. 9. 1991. godine, pokrenut je postupak za ocjenjivanje zakonitosti navedenih odredaba Pravilnika, kojima je utvrđeno: da se finansiranje stambenih potreba radnika obezbjeđuje iz sredstava ostvarenih ličnim učešćem radnika (član 6. stav 1. tačka 4.); učešćem radnika sopstvenim sredstvima u finansiranju stana (član 44. stav 1. tačka 1.); da radnik koji je podnio zahtjev za dodjelu stana na korištenje može uplatiti u Fond zajedničke potrošnje za stambenu izgradnju novčani iznos kao svoje lično učešće radi sticanja prava za dodjelu stana na korištenje, tako da radniku za svaki procenat vlastitog učešća u vrijednosti stana pripadaju 3 boda (član 46.); da se povraćaj vlastitih sredstava radniku vrši na taj način što mu se uložena sredstva vraćaju u roku koji ne može biti duži od 10 godina i sa kamatom koja ne može biti veća od bankarske kamate za tu svrhu kredita (član 47.); da radnik koji koristi stan u društvenoj svojini ili porodičnu stambenu zgradu ili stan u svojini, može ih ustupiti uz doplatu za veći stan u društvenoj svojini, sa pravom da zadrži isti vlasnički odnos (član 48.) i da u tom slučaju radnik vrši doplatu u visini razlike između cijene stana koji ustupa i cijene stana koji dobiva na korištenje (član 49.).

Zakonom o izdvajanju i usmjeravanju sredstava za stambene potrebe i o samoupravnim interesnim zajednicama u stambenoj oblasti ("Službeni list SRBiH", br. 13/74, 34/80 i 39/84) propisano je da radnici u organizacijama i zajednicama mogu svojim samoupravnim sporazumom utvrditi obavezu učešća ličnih sredstava radnika, koji treba da dobiju na korištenje stan u društvenoj svojini. Iznos učešća ličnih sredstava radnika, kao i uslovi i rokovi vraćanja tih sredstava utvrđuju se samoupravnim sporazumom organizacija i zajednica. Kriteriji i mjerila za učešće ličnih sredstava radnika utvrđuju se samoupravnim sporazumom u opštini (član 7.).

S obzirom na navedene zakonske odredbe, da bi se u opštem aktu o dodjeli stanova na korištenje utvrdila obaveza učešća ličnih sredstava radnika, potrebno je da se u tom aktu utvrdi iznos učešća ličnih sredstava radnika, uslovi i rokovi vraćanja tih sredstava, kao i da se u opštini, na čijem se području nalazi sjedište davaoca stana na korištenje, zaključi

samoupravni sporazum o kriterijima i mjerilima za učešće ličnih sredstava.

Kako u opštini Gračanica, na čijem se području nalazi sjedište donosioca osporavanog akta, takav samoupravni sporazum nije zaključen, to su, po ocjeni Ustavnog suda, osporene odredbe u suprotnosti sa zakonom.

U broj 168/91

Predsjednik

23. marta 1993. godine

Ustavnog suda BiH,

Sarajevo

prof. dr Ismet Dautbašić, s. r.

Društveni fond za penzijsko i invalidsko osiguranje Bosne i Hercegovine

Na osnovu člana 30. stav 4. Zakona o osnovnim pravima iz penzijskog i invalidskog osiguranja ("Službeni list SFRJ", br. 23/82, 77/82, 75/85, 8/87, 65/87, 87/89 i 44/90), koji je preuzet kao republički zakon Uredbom sa zakonskom snagom o preuzimanju saveznih zakona koji se u Bosni i Hercegovini primjenjuju kao republički zakoni ("Službeni list RBiH", broj 2/92) i člana 84. Statuta Društvenog fonda za penzijsko i invalidsko osiguranje Bosne i Hercegovine ("Službeni list SRBiH", broj 25/91), direktor Društvenog fonda za penzijsko i invalidsko osiguranje Bosne i Hercegovine, izdaje

SAOPŠTENJE

O PRETHODNOM USKLADIVANJU PENZIJA I NOVČANIH NAKNADA SA KRETANJEM LIČNIH DOHODAKA U JANUARU 1993. GODINE

1. Starosne, invalidske i porodične penzije (u daljem tekstu: penzije) određene od penzijskog osnova kod kojeg su lični dohodi iz ranijih godina valorizovani prema kretanju ličnih dohodaka u 1992. godini i penzije određene od penzijskog osnova koji predstavlja lični dohodak ostvaren u periodu januar-decembar 1992. godine, kao i novčane naknade po osnovu preostale radne sposobnosti za osiguranike samostalnih djelatnosti i druge osiguranike koji nisu u radnom odnosu i novčane naknade za vrijeme čekanja na zaposlenje djece omećene u fizičkom ili psihičkom razvoju (u daljem tekstu: novčane naknade), određene od osnova koji predstavlja lični dohodak ostvaren u periodu januar-decembar 1992. godine, odnosno lični dohodak iz neke ranije godine valorizovan prema kretanju ličnih dohodaka u 1992. godini, prethodno se uskladjuju sa kretanjem ličnih dohodaka svih zaposlenih radnika u Republici Bosni i Hercegovini u januaru 1993. godine u odnosu na 1992. godinu i povećavaju se za 326,374% počev od dana sticanja prava na penziju.

2. Povećanje iz prethodne tačke primjenjuje se na iznos penzije određene od penzijskog osnova, odnosno na iznos novčane naknade određene od osnova za određivanje novčane naknade.

3. Uskladjivanje penzija i novčanih naknada po ovom saopštenju izvršice se po službenoj dužnosti bez donošenja rješenja.

4. Ovo saopštenje objaviće se u "Službenom listu Republike Bosne i Hercegovine".

Broj BD-01-71/93

6. aprila 1993. godine

Sarajevo

Direktor

Luka Šijaković, s. r.

Advokatska komora Bosne i Hercegovine

Na osnovu člana 61. Statuta Advokatske komore BiH i člana 50. stav dva Tarife o nagradama i naknadi troškova advokata za rad advokata, Upravni odbor Advokatske komore BiH na sjednici održanoj 8. 02. 1993. godine, donio slijedeću:

ODLUKU

Mijenja se odredba člana 50. stav jedan, Glave treće, odredbe XVII Tarife o nagradama i naknadi troškova za rad advokata ("Službeni list RBiH", broj 10/92) tako da vrijednost boda iznosi 3.000,00 BH dinara.

Ova odluka stupa na snagu danom objavljivanja u "Službenom listu RBiH".

Broj 6/93

16. marta 1993. godine

Sarajevo

Predsjednik Upravnog odbora

Advokatske komore BiH,

advokat Galijatović Ekrem, s. r.

OGLASNI DIO

SLUŽBENE OBJAVE

SUDSKI OGLASI

Rješenjem likvidacionog vijeća Višeg suda u Sarajevu broj L-6/92 od 24. 12. 1992. godine otvoren je i istovremeno na osnovu člana 88. stav 1. Zakona o prinudnom poravnanju stečaju u likvidaciji zaključen postupak likvidacije nad Preduzećem u privatnoj svojini za unutrašnju i spoljnu trgovinu pekarskih proizvoda i prometa "PEMEXS" p. o. iz Sarajeva.

iz Višeg suda Sarajevo.

IZGUBLJENI PEČATI

Proglašava se nevažećim pečat prečnika 35 mm, okruglog oblika sa natpisom na latinici: Studentski centar Sarajevo. U sredini pečata nalazi se znak Studentskog centra, Novi paviljon Studentskog naselja "Bratstvo jedinstvo". (so-31/93)

Proglašava se nevažećim pečat okruglog oblika, promjera 30 mm sa sadržajem: ENERGOINVEST IRIS COMPUTER d. d. SINDIKAT Sarajevo 1. (so-33/93)

SADRŽAJ

221	Uredba sa zakonskom snagom o povećanju novčanih kazni i drugih novčanih iznosa	177
222	Odluka o izmjenama i dopunama kriterija za dodjelu napuštenih stanova na privremeno korišćenje	178
223	Uputstvo o uslovima i postupku izdavanja odobrenja državljanima Republike Bosne i Hercegovine za putovanje u inostranstvo na privremeni boravak za vrijeme ratnog stanja	178
224	Rješenje o davanju saglasnosti na cijene uglja za termoelektrane	182
225	Rješenje o davanju saglasnosti na cijene električne energije	182
226	Saopštenje o visini plata za april/travanj 1993. godine	182
227	Rješenje o izboru odbornika u Skupštinu okruga Sarajevo	182
USTAVNI SUD BOSNE I HERCEGOVINE		
	Odluka o utvrđivanju da su odredbe stava 2. Odluke broj 01-01-516/91 od 9. 7. 1991. godine i tačke I i III Odluke broj 01-01-616/91, od 1. 10. 1991. godine, Stomatološkog fakulteta u Sarajevu, u vrijeme važenja bile u suprotnosti sa zakonom	183
	Odluka o ukidanju odredbe člana 24. Odluke o doprinosu za zdravstvenu zaštitu, koju je donijela Samoupravna interesna zajednica zdravstvene zaštite Sarajevo	183

Odluka o odbijanju prijedloga Šumsko-privrednog preduzeća u društvenoj svojini "Gorica" Šipovo za ocjenjivanje zakonitosti Odluke o naknadi za vatrogastvo, broj 01/1-021-26/91, od 22. 3. 1991. godine, koju je donijela Skupština opštine Šipovo	184
Odluka o utvrđivanju odredbi člana 21. stav 1. tačka 5. Zakona o advokaturi	184
Odluka o utvrđivanju odredaba člana 41. tačka 10. Pravilnika o rješavanju stambenih potreba radnika Društvenog preduzeća za trgovinski promet na veliko i malo "Progres" Lukavac, od 15. 6. 1990. godine, u vrijeme važenja bila u suprotnosti sa zakonom	184
Odluka o ukidanju odredbe člana 6. stav 1. tačka 4, člana 44. stav 1. tačka 1. i članova 46, 47, 48. i 49. Pravilnika o stambenim odnosima Društvenog preduzeća za grafičke usluge "Štamparija" Gračanica, od 9. 10. 1990. godine	
DRUŠTVENI FOND ZA PENZIJSKO I INVALIDSKO OSIGURANJE BOSNE I HERCEGOVINE	
Saopštenje o prethodnom usklađivanju penzija i novčanih naknada sa kretanjem ličnih dohodaka u januaru 1993. godine	186
ADVOKATSKA KOMORA BOSNE I HERCEGOVINE	
Odluka o mijenjanju odredbi člana 50. stav jedan, Glave treće, odredbe XVII Tarife o nagradama i naknadi troškova za rad advokata	186

U okviru Republičke pravne biblioteke NIO Službenog lista R BiH izašla je iz štampe brošura

U S T A V
REPUBLIKE BOSNE I HERCEGOVINE
- prečišćeni tekst -

Brošura pored prečišćenog teksta Ustava R BiH sadrži:

Odluku o utvrđivanju prečišćenog teksta Ustava Republike Bosne i Hercegovine

Uredbu sa zakonskom snagom o provođenju Odluke republičkog referenduma

Uporedni pregled odredaba Prečišćenog teksta Ustava R BiH i odredaba Ustava R BiH, Ustava SFRJ i uredbi sa zakonskom snagom, koje su sadržane u Prečišćenom tekstu Ustava R BiH

Pregled odredaba Ustava R BiH koje su na osnovu člana 2. Uredbe sa zakonskom snagom o provođenju Odluke republičkog referenduma ("Službeni list R BiH", broj 3/93) prestale da važe

Pregled značajnijih promjena terminološke prirode u odredbama Ustava R BiH izvršenih u Prečišćenom tekstu Ustava R BiH na osnovu člana 2. Uredbe sa zakonskom snagom o provođenju Odluke republičkog referenduma ("Službeni list R BiH", br. 3/93)

Pregled odredaba Ustava R BiH u kojima su na osnovu Uredbe sa zakonskom snagom o provođenju Odluke republičkog referenduma ("Službeni list R BiH", br. 3/93) izvršene promjene terminološke prirode

Registar pojmova

Narudžbe slati na adresu:

NIO Službeni list R BiH
71000 Sarajevo
Magribija 3

ili na telefon 663-417 i 663-470, odnosno fax 663-470